



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka („Službeni glasnik BiH“ broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2009. GODINU SOCIJALDEMOKRATSKE UNIJE BiH

Broj: 03-07-6-114/10
Sarajevo, 14.02. 2011. godine

SADRŽAJ:

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
- Predmet revizije	5
- Cilj revizije	5
- Obim revizije	5
4. PREDHODNE KONTROLE I REVIZIJE	5
5. NALAZI REVIZIJE I PREPORUKE	5
5.1. NALAZI	5
5.2. PREPORUKE	9

MIŠLJENJE REVIZORA

Služba za reviziju finansiranja političkih stranaka (u daljem tekstu: Služba za reviziju) je izvršila reviziju finansijskog izvještaja **Socijaldemokratske unije Bosne i Hercegovine** za 2009. godinu. Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskom izvještaju, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom smo utvrdili da Socijaldemokratska unija Bosne i Hercegovine u izvještajnom periodu nije postupila u skladu sa odredbama, člana 8. stav (1) i člana 11. stav (1) i stav (3) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Socijaldemokratska unija Bosne i Hercegovine u 2009. godini postupala u skladu sa Zakonom o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Socijaldemokratske unije BiH za 2009. godinu.

Revizija je preduzeta u skladu sa članom 14. stav (1) Zakona o finansiranju političkih stranaka i članom 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08).

Zbog činjenice da se revizija obavlja na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Socijaldemokratska unija BiH je ostvarila prihode u iznosu od 277.956,09 KM¹, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk.prih. %
1	Članarina	70,00	0,02%
2	Prilozi fizičkih lica	0,00	0,00%
3	Prilozi pravnih lica	0,00	0,00%
4	Prihodi od imovine	0,00	0,00%
5	Prihodi od pr.lica	0,00	0,00%
6	Prihodi od poklona	0,00	0,00%
7	Prihodi iz budžeta	277.886,09	99,98%
	Ukupni prihodi:	277.956,09	100,00%

U godišnjem finansijskom izvještaju Socijaldemokratska unija BiH je iskazala ukupne rashode u iznosu od 424.824,83 KM².

2. PREDSTAVLJANJE POLITIČKE STRANKE

Naziv političke stranke: Socijaldemokratska unija BiH. Skraćeni naziv stranke SDU BiH.

Socijaldemokratska unija BiH registrovana je 2002. godine kod Kantonalnog suda u Sarajevu pod brojem R-I-9/02.

Sjedište političke stranke je u Sarajevu, ulica Maršala Tita br. 9a.

Lice ovlašteno za zastupanje stranke je Nermin Pećanac, predsjednik stranke.

Lice ovlašteno za podnošenje finansijskih izvještaja za 2009. godinu je Ramiz Kadrić.

Prema podacima iz godišnjeg finansijskog izvještaja za 2009. godinu, organizacionu strukturu Socijaldemokratske unije BiH čine:

- Centrala SDU BiH Sarajevo,
- Klub poslanika SDU BiH Sarajevo,
- 4 Kantonalna odbora SDU BiH,
- 2 Regionalna odbora SDU BiH i
- 22 Opštinska odbora SDU BiH.

¹ U finansijskom izvještaju koji je stranka dostavila 01.04.2010. godine ukupni prihodi stranke iskazani su u iznosu od 478.110,00 KM. Dana 13.07.2010. godine stranka je dostavila inoviran obrazac 3 - *Ukupni prihodi stranke* na kome je iskazan ukupan prihod u manjem iznosu u odnosu na prvobitno prikazan za 200.153,91 KM. Razlog za navedenu ispravku stranka je navela u svom dopisu br: 40/10 od 08.07.2010. godine, u kome tvrdi da je u pitanju formalna greška nastala prilikom popunjavanja obrasca.

² Ukupni rashodi stranke u gore navedenom iznosu neodgovaraju stvarnim rashodima stranke zbog prenosa sredstava na ime pomoći organizacionim dijelovima stranke. Tako je Klub Poslanika SDU BiH Sarajevo vršio prenos sredstava na ime pomoći kantonalnim odborima i organizacionim odborima stranke u iznosu od 125.151,00 KM. Također i Centrala stranke je vršila prenos sredstava nižim organizacionim dijelovima u iznosu od 43.285,00 KM. Ukupan iznos izvršenih prenosa sredstava unutar stranke iznosi 168.436,00 KM, za koliko su uvećani i ukupni rashodi stranke.

3. OPIS REVIZIJE

Predmet revizije je godišnji finansijski izvještaj SDU BiH za 2009. godinu, i to sljedećih organizacionih djelova:

1. Centrala SDU BiH Sarajevo,
2. Klub poslanika SDU BiH Sarajevo,
3. Kantonalni odbor SDU BiH Sarajevo i
4. Kantonalni odbor SDU BiH Tuzla.

Cilj revizije je da se prikupi dovoljno relevantnih dokaza kako bi se moglo izraziti mišljenje o tome da li je Socijaldemokratska unija BiH u izvještajnom periodu postupala u skladu sa odredbama Zakona o finansiranju političkih stranaka.

Obim revizije finansijskog izvještaja Socijaldemokratske unije BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

4. PRETHODNE KONTROLE I REVIZIJE

Služba za reviziju je izvršila pregled i reviziju godišnjih finansijskih izvještaja SDU BiH u periodu od 2005. do 2008. godine i izdala revizijske izvještaje sa mišljenjem revizora, nalazima i preporukama da stranka treba da postupi u skladu sa odredbama člana 6., člana 8. stav (1) i člana 11. stav (1), stav (3) i stav (4) Zakona o finansiranju političkih stranaka i člana 15.10 Izbornog zakona BiH.

Nerealizovane preporuke:

Na osnovu uočenih nedostataka u godišnjem finansijskom izvještaju za 2009. godinu, utvrđeno je da politička stranka nije ispoštovala preporuke koje su date u izvještajima o pregledu godišnjih finansijskih izvještaja za 2007. i 2008. godinu, odnosno stranka je postupila suprotno odredbama člana 8. stav (1), člana 11. stav (1) i stav (3) Zakona o finansiranju političkih stranaka.

5. NALAZI REVIZIJE I PREPORUKE

5.1 NALAZI

a) Socijaldemokratska unija Bosne i Hercegovine je prekršila odredbe člana 8. stav (1) Zakona o finansiranju političkih stranaka.³

Na osnovu prikupljenih revizijskih dokaza, utvrđeno je da su sljedeći odbori Socijaldemokratske unije BiH koristili bez naknade prostorije udruženja i opštinskih organa uprave:

- Opštinska organizacija SDU BiH Glamoč je na osnovu Ugovora o korištenju poslovnog prostora zaključenog 05.12.2007. godine sa zakupodavcem Centar za lokalni razvoj Glamoč koristila kancelarijski prostor bez naknade.
- Opštinska organizacija SDU BiH Centar Sarajevo je na osnovu Odluke o dodjeli na korištenje bez naknade poslovnih prostorija Općine Centar Sarajevo broj: 01-49-441/05 od 24.02.2005. godine koristila bez naknade poslovne prostorije ukupne površine 44 m². Prema odluci o dodjeli u zakup poslovnih zgrada i prostorija Općine Centar Sarajevo broj: 01-49-1690/09 od 23.06.2009. godine („Službene novine Kantona Sarajevo“ broj 20/09), najniži iznos zakupnine

³ Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

- u I zoni Općine Centar iznosi 20,00 KM po m². Korištenjem poslovnog prostora u periodu od januara do decembra 2009. godine bez naknade SDU BiH je ostvarila zabranjen prilog Općine Centar u iznosu od 10.560,00 KM.
- Opštinski odbor SDU BiH Ilijaš je na osnovu Ugovora o zakupu poslovnih prostorija broj: 06-23-2536/03 od 24.10.2003. godine koristio bez naknade prostorije Opštine Ilijaš ukupne površine 19 m². Prema odluci o načinu i visini plaćanja zakupnine poslovnih prostora na području Općine Ilijaš broj: 01-I-02-189/00 od 17.02.2000. godine („Službene novine Kantona Sarajevo“ broj 2/00), najniži iznos zakupnine u II zoni Općine Ilijaš iznosi 8,00 KM po m². Na bazi navedene odluke, utvrđeno je da je SDU BiH usljed neplaćanja zakupnine ostvarila zabranjen prilog od Općine Ilijaš u iznosu od 1.824,00 KM.
 - Općinski odbor SDU BiH Ilidža je na osnovu Odluke o dodjeli na korištenje bez naknade poslovnih prostorija Općine Ilidža broj: 01-02-339/08-8 od 19.02.2008. godine, koristio bez naknade poslovni prostor površine 8,94 m² u periodu od 01.01. – 30.09.2009. godine. Obzirom da visina zakupnine za I zonu, u kojoj se nalaze poslovne prostorije koje koristi OO SDU BiH Ilidža iznosi 12,00 KM po m², vrijednost zabranjenog priloga koji je stranka primila od Općine Ilidža iznosi 965,52 KM. Pored navedenog, prema odredbama člana 2. stav (2) navedene Odluke Općinskog vijeća Ilidža, stranka nije imala obavezu da plaća troškove električne energije, vode, centralnog grijanja, naknade za odvoz smeća i naknade za redovno održavanje zajedničkih dijelova zgrade i upravljanja zgradom. Općinski odbor SDU BiH Ilidža je na osnovu ugovora o zakupu poslovnog prostora broj: 05-23-583/3-08 od 07.10.2009. godine, koristio poslovni prostor površine 16,70 m², po cijeni koja je ugovorena u iznosu od 2,00 KM po m², odnosno 10% od početne cijene zakupa po m² koja iznosi 20,00 KM za extra zonu u kojoj se nalazi navedeni poslovni prostor. Korištenjem poslovnog prostora u periodu od oktobra do decembra 2009. godine, po cijeni koja je ispod početne, SDU BiH je ostvarila zabranjen prilog od Općine Ilidža u iznosu od 901,80 KM. Na osnovu navedenog, stranka je primila zabranjen prilog od Općine Ilidža u ukupnom iznosu 1.867,32 KM za 2009. godinu.

Korištenjem prostorija opštinskih organa uprave i Centra za lokalni razvoj Glamoč bez naknade, stranka je postupila suprotno odredbama člana 8. stav (1) Zakona o finansiranju političkih stranaka.

b) Socijaldemokratska unija Bosne i Hercegovine je prekršila odredbe člana 11. stav (1) i stav (3) Zakona o finansiranju političkih stranaka.⁴

Na osnovu obavljene revizije utvrđeno je da Socijaldemokratska unija Bosne i Hercegovine nije vodila adekvatne evidencije o svojim prihodima i rashodima i da godišnji finansijski izvještaj za 2009. godinu nije popunila u skladu sa Pravilnikom o godišnjim finansijskim izvještajima političkih stranaka, čime su prekršene odredbe člana 11. stav (1) i stav (3) Zakona o finansiranju političkih stranaka.

- (1) Revizijom godišnjeg finansijskog izvještaja utvrđeno je da stranka nije iskazala transakcijski račun broj: 3385302201662060 otvoren kod Unicredit banke dd - Filijala Bosanska Krupa. Na osnovu akta Opštine Bosanska Krupa broj 08-14-3328-1/10 od 19.07.2010. godine, koji je dostavljen na zahtjev Centralne izborne komisije BiH, utvrđeno je da je stranka na navedeni račun, koji nije iskazala u godišnjem finansijskom izvještaju, primila uplatu po osnovu prihoda iz budžeta Općine Bosanska Krupa u iznosu od 2.123,00 KM. Socijaldemokratska unija BiH prekršila je odredbe člana 11. Pravilnika o godišnjim finansijskim izvještajima političkih stranaka jer nije pravilno popunila obrazac 2 (*Pregled prometa svih transakcijskih računa političke stranke*) godišnjeg finansijskog izvještaja.⁵

⁴ U skladu sa članom 11. stav (1) Zakona o finansiranju političkih stranaka političke stranke su obavezne voditi evidenciju o svojim prihodima i rashodima. U skladu sa članom 11. stav (3) Zakona politička stranka je obavezna da Centralnoj izbornoj komisiji Bosne i Hercegovine podnosi finansijske izvještaje na obrascima koje je odobrila CIK BiH, a čiji su sadržaj i forma propisani Pravilnikom o godišnjim finansijskim izvještajima političkih stranaka.

⁵ U obrazac 2 - *Pregled prometa svih transakcijskih računa političke stranke*, unose se sljedeći podaci: naziv organizacionog dijela, broj računa, naziv banke, stanje računa na dan 01.01. ili stanje na dan otvaranja računa, ukupan promet ulaza bez početnog stanja, ukupan promet izlaza i stanje na dan 31.12., odnosno do momenta gašenja računa.

- Revizijom godišnjeg finansijskog izvještaja, te na osnovu dodatne dokumentacije koju je stranka dostavila utvrđeno je da podaci iskazani u godišnjem finansijskom izvještaju za organizacioni dio stranke u Bihaću neodgovaraju stvarnom stanju. Detaljnom kontrolom izvoda transakcionog računa broj: 1610350007390084 otvorenog kod Raiffeisen banke - Filijala Bihać, za period od 01.01. - 31.12.2009. godine, utvrđeno je da je stranka iskazala početno stanje, promet po računu i krajnje stanje u manjim iznosima u odnosu na stvarno knjigovodstveno stanje. Naime, stranka je početno stanje utvrđeno na dan 01.01.2009. godine u godišnjem finansijskom izvještaju iskazala u manjem iznosu za 1.465,02 KM, ukupan promet ulaza po transakcijskom računu iskazan je manjem iznosu za 11.075,06 KM, ukupan promet izlaza po transakcijskom računu iskazan je u manjem iznosu za 6.776,04 KM, te konačno stanje na dan 31.12.2009. godine iskazano je u manjem iznosu za 5.764,04 KM, čime je prekršila odredbe člana 11. Pravilnika o godišnjim finansijskim izvještajima političkih stranaka. U skladu sa navedenim članom Pravilnika stranka je bila obavezna iskazati sve transakcijske račune zajedno sa nazivom organizacionog dijela stranke, početno stanje, ukupan promet ulaza i izlaza te stanje na dan 31.12.2009. godine.
- (2) Revizijom godišnjeg finansijskog izvještaja utvrđeno je da podaci iskazani u godišnjem finansijskom izvještaju za 2009. godinu, za slijedeće organizacione dijelove stranke ne odgovaraju stvarnom knjigovodstvenom stanju, i to za: Centralu stranke, Kantonalni odbor Sarajevo i Kantonalni odbor Tuzla. Detaljnom kontrolom dnevnika blagajne za period 01.01. - 31.12.2009. godine navedenih organizacionih dijelova stranke utvrđeno je da stranka nije pravilno iskazala u godišnjem finansijskom izvještaju početno stanje blagajne, ukupan promet ulaza i izlaza iz blagajne, te konačno stanje blagajne na dan 31.12.2009. godine.
- Revizijom dnevnika blagajne Centrale SDU BiH utvrđeno je da je stranka početno stanje blagajne na dan 01.01.2009. godine iskazala u manjem iznosu za 1,00 KM, ukupan promet ulaza iskazan je u većem iznosu za 350,70 KM, ukupan promet izlaza iskazan je u većem iznosu za 342,79 KM, te konačno stanje blagajne na dan 31.12.2009. godine iskazano je u većem iznosu za 6,91 KM.
 - Revizijom dnevnika blagajne KO SDU BiH Sarajevo utvrđeno je da je stranka početno stanje blagajne na dan 01.01.2009. godine iskazala u većem iznosu za 13,80 KM, ukupan promet ulaza u blagajnu iskazan je u manjem iznosu za 1.669,00 KM, ukupan promet izlaza iz blagajne iskazan je u manjem iznosu za 1.700,00 KM, te konačno stanje blagajne na dan 31.12.2009. godine iskazano je u većem iznosu za 44,80 KM.
 - Revizijom dnevnika blagajne KO SDU BiH Tuzla utvrđeno je da je stranka ukupan promet ulaza u blagajnu iskazala u manjem iznosu za 312,70 KM, ukupan promet izlaza iz blagajne iskazan je u manjem iznosu za 612,11 KM, te konačno stanje blagajne na dan 31.12.2009. godine iskazan je u većem iznosu za 299,41 KM.
- Na osnovu navedenog, utvrđeno je da je stranka prekršila odredbe člana 12. Pravilnika o godišnjim finansijskim izvještajima političkih stranaka. U skladu sa navedenim članom Pravilnika stranka je bila obavezna u obrascu 2-1 (Pregled stanja blagajne) iskazati naziv organizacionog dijela stranke, saldo blagajne na dan 01.01.2009. godine, ukupne ulaze i izlaze iz blagajne te saldo blagajne na kraju perioda.
- (3) Kontrolom dodatne dokumentacije, utvrđeno je da Socijaldemokratska unija Bosne i Hercegovine nije iskazala za svoja dva organizaciona dijela prihode iz budžeta općina, čime je prekršila odredbe člana 11. stav (1) Zakona o finansiranju političkih stranaka.
- Na osnovu podataka, koje je na zahtjev Centralne izborne komisije BiH, dostavila Općina Bihać, akt broj: 06/1-14-8640/10 od 27.07.2010. godine, te na osnovu kontrole izvoda stranke, utvrđeno je da stranka za svoj organizacioni dio u Bihaću, u godišnjem finansijskom izvještaju, nije iskazala prihode iz budžeta Općine Bihać u iznosu od 9.317,65 KM.
 - Na osnovu podataka, koje je na zahtjev Centralne izborne komisije BiH, dostavila Općina Bosanska Krupa, akt broj: 08-14-3328-1/10 od 19.07.2010. godine, utvrđeno je da stranka za organizacioni dio u Bosanskoj Krupi, nije iskazala prihode iz budžeta Općine Bosanska Krupa u iznosu od 2.123,00 KM.

Na osnovu navedenih nalaza, utvrđeno je da je stranka prekršila odredbe člana 13. (Ukupni prihodi političke partije – izvori finansiranja) i člana 19. (Prihodi iz budžeta), jer je ukupne prihode stranke po osnovu prihoda iz budžeta iskazala u manjem iznosu za 11.440,65 KM. U skladu sa navedenim članom stranka je bila obavezna u godišnjem finansijskom izvještaju evidentirati sva sredstva, iz budžeta svih nivoa vlasti, koja je stranka primila u izvještajnom periodu.

(4) Revizijom je utvrđeno da je stranka, za svoja dva organizaciona dijela, iskazala ukupne rashode u većem iznosu za ukupno 168.436,00 KM, čime je prekršila odredbe člana 11. stav (1) Zakona o finansiranju političkih stranaka.

- Uvidom u obrazac 4-1 (Režijsko - administrativni i ostali troškovi) Centrale SDU BiH, utvrđeno je da je stranka evidentirala prenos sredstava nižim organizacionim dijelovima stranke kao trošak tekućeg perioda u ukupnom iznosu od 43.285,00 KM, čime su i ukupni rashodi stranke uvećani za navedeni iznos.

- Kontrolom obrasca 4-1 Parlamentarne grupe SDU BiH, utvrđeno je da je stranka iskazala prenos novčanih sredstava drugim organizacionim dijelovima stranke kao trošak tekućeg perioda u iznosu od 125.151,00 KM, za koliko su uvećani i ukupni rashodi stranke.

Na osnovu navedenih nalaza, utvrđeno je da je stranka postupila suprotno odredbama člana 20. (Rashodi političke stranke) i člana 21. (Režijsko-administrativni troškovi i ostali troškovi) Pravilnika o godišnjim finansijskim izvještajima političkih stranaka.⁶ U skladu sa navedenim članovima Pravilnika, novčana sredstva koja jedan organizacioni dio prenosi drugom organizacionom dijelu političke stranke ne smatra se rashodom.

(5) U svom knjigovodstvu stranka nema uspostavljene potpune evidencije o svim troškovima koji su nastali u 2009. godini. Stranka u svojim poslovnim knjigama, niti u godišnjem finansijskom izvještaju, nije evidentirala troškove zakupnine poslovnih prostora u iznosima koji su utvrđeni prema ugovorima o zakupu koje je stranka potpisala sa svojim zakupodavcima, niti obaveze po tom osnovu.

- Revizijom dodatne dokumentacije stranke, utvrđeno je da Socijaldemokratska unija Bosne i Hercegovine nije iskazala troškove zakupa po osnovu ugovora o zakupu poslovnog prostora zaključenog 03.03.2008. godine, za organizacioni dio stranke u Bihacu u iznosu od 1.800,00 KM⁷.

- Za organizacioni dio stranke u Hadžićima stranka je po osnovu ugovora o zakupu poslovnog prostora zaključenog 29.12.2006. godine bila obavezna u 2009. godini iskazati troškove zakupnine u iznosu od 1.200,00 KM⁸. Obzirom da navedeni troškovi nisu iskazani, stranka je i ukupne rashode iskazala u manjem iznosu za 1.200,00 KM.

- Za organizacioni dio stranke u Novom Sarajevu stranka je po osnovu ugovora o zakupu poslovnog prostora zaključenog 01.01.2009. godine, bila obavezna u 2009. godini iskazati troškove zakupnine u ukupnom iznosu od 3.600,00 KM⁹. Stranka je navedene troškove u godišnjem finansijskom izvještaju iskazala u manjem iznosu za 1.500,00 KM, za koliko su umanjeni i ukupni rashodi političke stranke.

Neiskazujući troškove zakupnine za pojedine organizacione dijelove ili iskazujući ih u manjem iznosu od stvarnih, stranka je postupila suprotno odredbama člana 20. i člana 21. Pravilnika o godišnjim finansijskim izvještajima političkih stranaka. U skladu sa navedenim članovima Pravilnika stranka je bila obavezna iskazati sve režijsko-administrativne troškove i to naziv organizacionog dijela stranke, vrstu troška, konto i iznos.

(6) Revizijom godišnjeg finansijskog izvještaja utvrđeno je da je stranka za svoj organizacioni dio, Centralu SDU BiH, troškove propagande iz prethodne (2008.) godine, u iznosu od

⁶ U skladu sa članom 20. stav (4) istog Pravilnika novčana sredstva koja jedan organizacioni dio prenosi drugom organizacionom dijelu unutar političke stranke ne smatra rashodom.

⁷ Ugovor o zakupu poslovnog prostora između OO SDU BiH Bihac i Alme Bašić iz Bihaca, zaključen dana 03.03.2008. godine. Mjesečni zakup 150,00 KM, godišnji zakup 1800,00 KM.

⁸ Ugovor o zakupu između GDS BiH OO Hadžići i SDU BiH OO Hadžići, zaključen 29.12.2006.godine.Mjesečni zakup 100,00 KM, godišnji zakup 1200,00 KM.

⁹ Ugovor o zakupu prostorija sa „Mašine i oprema“doo Sarajevo, broj: 06/09 od 01.01.2009. godine. Mjesečni zakup 300,00 KM, godišnji 3600,00 KM.

47.069,70 KM¹⁰, iskazala kao trošak tekućeg perioda umjesto kao rashode iz ranijeg perioda što je u skladu sa računovodstvenim propisima trebala učiniti.

- (7) Stranka SDU BiH nije iskazala obaveze u godišnjem finansijskom izvještaju. Revizijom godišnjeg finansijskog izvještaja utvrđeno je da stranka troškove evidentira tek kad izvrši plaćanje, a ne u momentu kada je trošak nastao.¹¹

U godišnjem finansijskom izvještaju, Klub poslanika SDU BiH je iskazao troškove u iznosu od 153.632,90 KM, dok ukupan promet kratkoročnih obaveza u 2009. godini iznosi 7.551,50 KM. Centrala SDU BiH je iskazala troškove u iznosu od 157.300,52 KM, dok ukupan promet kratkoročnih obaveza iznosi 62.278,04 KM. Kantonalni odbor SDU BiH Sarajevo je iskazao troškove u iznosu od 31.612,50 KM, dok ukupan promet kratkoročnih obaveza iznosi 1.800,00 KM. KO SDU BiH Tuzla je iskazao troškove u iznosu od 22.325,44 KM, dok ukupan promet kratkoročnih obaveza iznosi 3.173,75 KM.

Stranka je prekršila odredbe člana 23. Pravilnika o godišnjim finansijskim izvještajima političkih stranaka¹², u skladu sa kojim je bila obavezna u izvještajnom periodu iskazati ukupne obaveze po kreditima i pozajmicama i ukupne obaveze po dugovanjima političke stranke.

5.2. PREPORUKE

Preporučuje se Socijaldemokratskoj uniji Bosne i Hercegovine da se pridržava odredbi Zakona o finansiranju političkih stranaka, a posebno na osnovu uočenih nedostataka se preporučuje:

- ***da postupa u skladu sa odredbama člana 8. stav (1) i člana 11. stav (1) i stav (3) Zakona o finansiranju političkih stranaka i to:***
 - ***da ne prima priloge koji su zabranjeni ovim zakonom,***
 - ***da vodi evidencije o svojim prihodima, rashodima i obavezama, te***
 - ***da finansijske izvještaje koje podnosi Centralnoj izbornoj komisiji BiH sačinjava u formi propisanoj Pravilnikom o godišnjim finansijskim izvještajima političkih stranaka.***
- ***da preduzme korake na uspostavljanju što bolje saradnje i kontrole nad poslovanjem svih organizacionih dijelova stranke, a sa ciljem uspostavljanja kontrole nad finansijskim poslovanjem stranke i postupanja u skladu sa odredbama ovog Zakona.***

KOMENTAR:

Socijaldemokratska unija Bosne i Hercegovine nije se očitovala na nalaze revizije date u Preliminarnom izvještaju o reviziji godišnjeg finansijskog izvještaja za 2009. godinu koji je stranci dostavljen 20.01.2011. godine.

Koristimo priliku da se zahvalimo osoblju Socijaldemokratske unije Bosne i Hercegovine u Sarajevu na korektnom i profesionalnom odnosu i visokom stepenu saradnje tokom obavljanja revizije u prostorijama stranke.

Mr. Hasida Gušić, šef Službe za reviziju

Nevenko Andan, revizor

Amela Batuša, pomoćnik revizora

¹⁰ Bruto Bilans Centrale SDU BiH za 2009. godinu, Konto 40157 Troškovi izborne aktivnosti.

¹¹ Uvid u poslovne knjige: Bruto bilans Kluba poslanika, Bruto bilans Centrale, i Bruto bilanse KO SDU BiH Sarajevo i KO SDU BiH Tuzla.

¹² U skladu sa članom 23. stav (1) tačka b) u obrazac 5. unose se sljedeći podaci: naziv povjerioca, iznos duga, datum nastanka duga, visina rate i rok vraćanja duga.